

I. DISPOSICIÓN XERAIS

MINISTERIO DE SANIDADE E POLÍTICA SOCIAL

5040 *Real decreto 374/2010, do 26 de marzo, sobre as prestacións económicas da Lei 39/2006, do 14 de decembro, de promoción da autonomía persoal e atención ás persoas en situación de dependencia para o exercicio 2010.*

A Lei 39/2006, do 14 de decembro, de promoción da autonomía persoal e atención ás persoas en situación de dependencia (en diante, Lei 39/2006) no seu artigo 14 cita as prestacións de atención á dependencia, entre as cales se encontran, nos seus números 3, 4 e 5, as distintas prestacións económicas que poden derivar da aplicación da lei.

Estas prestacións económicas posteriormente veñen reguladas nos artigos seguintes: no artigo 17, a prestación económica vinculada ao servizo, no artigo 18, a prestación económica para coidados no ámbito familiar, e no artigo 19, a prestación económica de asistencia persoal.

O artigo 20 do citado texto legal sinala que a contía das mencionadas prestacións económicas será acordada polo Consello Territorial do Sistema para a Autonomía e Atención á Dependencia, para a súa aprobación posterior polo Goberno mediante real decreto.

O Real decreto 727/2007, do 8 de xuño, sobre criterios para determinar as intensidades de protección dos servizos e a contía das prestacións económicas da Lei 39/2006, do 14 de decembro, de promoción da autonomía persoal e atención ás persoas en situación de dependencia (en diante, Real decreto 727/2007), establece no artigo 13.1 que a contía das prestacións económicas do Sistema para a Autonomía e Atención á Dependencia será establecida anualmente polo Goberno mediante real decreto, logo de acordo do Consello Territorial do Sistema para a Autonomía e Atención á Dependencia (SAAD), para os graos e niveis con dereito a prestacións, e que se actualizará en función do incremento do índice de prezos de consumo (IPC).

O Real decreto 73/2009, do 30 de xaneiro, sobre as prestacións económicas da Lei 39/2006, fixou no seu anexo as contías máximas das prestacións económicas por situación de dependencia en grao III, gran dependencia, niveis 1 e 2, e grao II, dependencia severa, niveis 1 e 2, para o ano 2009.

Por tanto, logo de acordo do Consello Territorial do Sistema para a Autonomía e Atención á Dependencia (SAAD) adoptado en reunión celebrada o día 25 de xaneiro de 2010, corresponde ao Goberno establecer a contía, para o ano 2010, das prestacións económicas do Sistema para a Autonomía e Atención á Dependencia para os graos e niveis con dereito a prestacións, e actualizala, cando proceda, en función do incremento do índice de prezos de consumo (IPC).

En consecuencia, este real decreto, de acordo coas previsións legais citadas, desenvolve o disposto na disposición derradeira primeira da Lei 39/2006, na que se establece o calendario de aplicación progresiva da lei respecto da efectividade dos dereitos ás prestacións de dependencia.

Procédese, por tanto, á revalorización da contía máxima das prestacións económicas previstas na carteira de servizos e prestacións do Sistema para a Autonomía e Atención á Dependencia, que se aplicará, no exercicio 2010, para aquelas persoas que sexan ou foron recoñecidas grao III, gran dependencia, niveis 1 e 2, e grao II, dependencia severa, niveis 1 e 2, permitindo o mantemento do poder adquisitivo dos beneficiarios de acordo co aumento do custo da vida.

No seu proceso de elaboración, este real decreto foi sometido a consulta do Comité Consultivo do Sistema para a Autonomía e Atención á Dependencia, do Consello Estatal de Persoas Maiores, do Consello Nacional da Discapacidade e do Consello Estatal de Organizacións non Governamentais de Acción Social.

Este real decreto dítase ao abeiro do disposto no artigo 149.1.1.^a da Constitución, que lle atribúe ao Estado a competencia exclusiva sobre a regulación das condicións básicas que garantan a igualdade de todos os españois no exercicio dos dereitos e no cumprimento dos deberes constitucionais.

Esta norma dítase ao abeiro da facultade conferida ao Goberno na disposición derradeira sétima e no artigo 20 da Lei 39/2006 e no artigo 13.1 do Real decreto 727/2007.

Na súa virtude, por proposta da ministra de Sanidade e Política Social, co informe previo do Ministerio de Economía e Facenda, de acordo co Consello de Estado e logo de deliberación do Consello de Ministros na súa reunión do día 26 de marzo de 2010,

DISPOÑO:

Artigo 1. *Obxecto.*

Este real decreto ten por obxecto establecer as contías máximas das prestacións económicas por grao e nivel previstas no capítulo II do título I da Lei 39/2006, do 14 de decembro, de promoción da autonomía persoal e atención ás persoas en situación de dependencia, para o exercicio 2010.

Artigo 2. *Importe máximo das prestacións económicas do grao III, gran dependencia, niveis 1 e 2, e grao II, dependencia severa, niveis 1 e 2.*

Procédese ao desenvolvemento das previsións contidas, en materia de revalorización das prestacións económicas do Sistema para a Autonomía e Atención á Dependencia, no Real decreto 727/2007, do 8 de xuño, sobre criterios para determinar as intensidades de protección dos servizos e a contía das prestacións económicas da Lei 39/2006, do 14 de decembro, de promoción da autonomía persoal e atención ás persoas en situación de dependencia. Para tales efectos, revísanse os importes fixados no anexo do Real decreto 73/2009, do 30 de xaneiro, sobre as prestacións económicas da Lei 39/2006, en función dun incremento do IPC anual de 0,3 por cento.

En consecuencia, para o ano 2010 as contías máximas das prestacións económicas correspondentes ao grao III, gran dependencia, niveis 1 e 2, e grao II, dependencia severa, niveis 1 e 2, serán as que se determinan no anexo deste real decreto.

Disposición adicional única. *Cotas á Seguridade Social derivadas da prestación económica para coidados no ámbito familiar.*

A cota por seguridade social, incluída a correspondente a formación profesional, que consta no anexo deste real decreto en relación coa prestación económica para coidados no ámbito familiar e apoio a coidadores non profesionais, será aboada directamente polo Instituto de Maiores e Servizos Sociais (IMSERSO) á Tesouraría Xeral da Seguridade Social.

Disposición transitoria única. *Situacións xurídicas preexistentes.*

Así mesmo, as prestacións económicas recoñecidas con anterioridade ao exercicio 2010 incrementarán a contía que viñesen percibindo durante o exercicio de 2009 mediante a aplicación do incremento do IPC anual de 0,3 por cento, con efectos desde o 1 de xaneiro de 2010.

Disposición derogatoria única. *Derrogación normativa.*

Quedan derogadas cantas disposicións de igual ou inferior rango se opoñan ao disposto neste real decreto.

Disposición derradeira primeira. *Título competencial.*

Este real decreto dítase ao abeiro do disposto no artigo 149.1.1.^a da Constitución, que lle atribúe ao Estado a competencia exclusiva sobre a regulación das condicións básicas que garantan a igualdade de todos os españois no exercicio dos dereitos e no cumprimento dos deberes constitucionais.

Disposición derradeira segunda. *Habilitación para o desenvolvemento regulamentario.*

Habilítase o titular do Ministerio de Sanidade e Política Social para ditar as disposicións que sexan necesarias para a aplicación e desenvolvemento deste real decreto.

Disposición derradeira terceira. *Entrada en vigor e efectos.*

Este real decreto entrará en vigor o día da súa publicación no «Boletín Oficial del Estado», con efectos do día 1 de xaneiro de 2010.

Dado en Madrid o 26 de marzo de 2010.

JUAN CARLOS R.

A ministra de Sanidade e Política Social,
TRINIDAD JIMÉNEZ GARCÍA-HERRERA

ANEXO

Contías máximas das prestacións económicas por grao e nivel para o ano 2010

Graos e niveis	Prestación económica vinculada ao servizo – Euros mensuais	Prestación económica para cuidados no ámbito familiar – Euros mensuais		Prestación económica de asistencia persoal – Euros mensuais
	Contía	Contía	Cota SS+FP	Contía
Grao III, nivel 2	833,96	520,69		833,96
Grao III, nivel 1	625,47	416,98	162,49	625,47
Grao II, nivel 2	462,18	337,25	(161,01 + 1,48)	
Grao II, nivel 1	401,20	300,90		